

Alaun darauff / vnd fese den Theil in ein Windofen / doch mit kleinem  
 Feuer / vnd laß ihn also außbrennen / daß er durch auß bey sich keine scharpffe  
 materia behalten muß / vnd gleich einer terra verglichen würd / dann der  
 Alaun bringet den ♀. an / daß er sich zu den andern Species vereiniget / vnd  
 den Fixen Schwefel der im Kieß ist / zu sich ziehen hilfft / daß der ♀. das  
 vollendet vnd vollbringet / wie E. Churf. Gn. darinnen sich in meinem  
 Vorgeben gnädigst ersehen werden / auch die rechte Wahrheit wird finden  
 vnd haben. Also seynd die Species, wie bemeldet worden / in ihren Würden  
 gerecht zu dem gebranden Kieß / so man ihn einrichten will / als zu einem  
 Amalgama. Was die Kreiden anlanget / die man brauchen thut zu  
 dem ♂. wird also zugerichtet / man nimbt Kreiden / leget die in ein Re-  
 genwasser / läßt sie durch ziehen / so solches geschehen / widerumb herausser  
 genommen / vnd im Windofen gebrand / daß sie durch auß erglüet ist / also  
 ist sie gerecht zu dem Antimonio, nembt deren so viel / wie vorn im ♂. ver-  
 meldet worden ist. So man nun gnädigster Churfürst vnd Herz / solchen  
 Kieß gebrand hat / auch die Species, die seynd gemeldet worden / ganz vnd  
 garbensammen / vnd also zugerichtet worden seynd / werden E. Churf. Gn.  
 die Transmutation ♂. in ♀. haben / daß sich E. Churf. Gn. darob ver-  
 wundern werden / wann nun E. Churf. Gn. des gemachten ♀. eine Marc  
 haben / muß E. Churf. Gn. weiter damit also procediren / daß sichs in Solem  
 transmutiret, als nemlich also / Man nimbt des zugerichten ♀. ein Marc /  
 thut sie in einen Tiegel / wann sie geflossen vnd wol treiben thut / thut man  
 hinein 7. Loth gar gut Ungarisch Goldt / vnd laß es mit dem ♀. eine gute  
 halbe Stund mit einander fließen / alsdann herausser gegossen an Ziener  
 oder Geförnd / gilt alles gleich / das Gold muß derentwegen darzugenom-  
 men werden / gnädigster Churfürst vnd Herz / daß das transmutirt ♀. so auß  
 dem Wege von ♂. kömen oder gemacht worden ist / einen Samen hat / wel-  
 cher Samen sich also mit ihm vergleichen thut / daß der ♀. sein Frucht  
 reichlich widerbringet vnd geben muß / wie E. Churf. Gn. gnädigst sehen  
 werden / wann es E. Churf. Gn. vor die Hand zuversuchen / nehmen wird /  
 wann ich nun obbemeltes ♀. mit den zugethanen 2. Loth ☉. habe / so muß  
 ich dergestalt weiter mit procediren / nemlichen also / Ich thue das ♀. also  
 ganz in ein Glas / je stärker es ist / je besser es ihnen ist / wegen der langsamen  
 gradation / dann je subtiler sie es aufflöset / je reicher ich das ☉. in seiner  
 Proba befinden thue / so ich es nun in das Glas gethan habe / so geuß ich dar-  
 auff ein Aqua Fort / das vber das ♀. guter 2. Finger hoch stehet / laß es also  
 soluiren von sich selbst / vnd nicht vber dem Feuer / darein ich auch darzu 1. q.  
 schwer roh Eysen / derhalben daß es sich in ihm selbst erhitzen muß / vnd  
 lasse es also soluiren / 3. Tag nach einander per se weg / man muß aber zuvor  
 oder